

www.BibleForChildren.org

मती 26



निस्तार पाबैनके
छ दिन पहिने येसु
बेथानिया गाममे एलै।
ओते लाजरस रहैछेलै,
जकरा येसु मुरदासे जियाइने
छेलै। तब मरियम करिब अधा
लिटर बहौत महग अतरके
गमकौवा तेल आइनेके
येसुके टाडमे लगादेल्कै आ
आपन केससे पोइछ देल्कै।
ओइ तेलके गमकसे पुरे
घर गमगम करेलाग्लै।




तब बारह चेलासबमेसे यहूदा इस्करियोती येसुके मुख
पुजारीसबके हाथमे पकराबैके खातिर ओकरेसब लग गेलै।
यहूदाके बात सुइन्के मुलपुजारीसब
बहौत खुसी भेलै आ पैसा दैले कबुल
करलकै। तखनिएसे येसुके
पकराइले मौका ताके लागलै।



तब येसुके कहल बमौजी चेलासब
निस्तार पाबैनके भोज ओतै तैयार
करलकै। उसब भोज खाइते खिना येसु
रोटी लेलकै आ परमेस्वरके धन्यबाद
देलकै। उ रोटीके तोड़के चेलासबके देलकै
आ कहलकै, “ले, आ खो यि हमर देह
चियौ।” तकरबाद उ बाटी लेलकै आ
धन्यबाद दयाके चेलासबके दैत कहलकै,
“तुहे सबगोरा एहि मेसे पि।
यि परमेस्वर आ
लोकसबके बिचमे
सम्बन्ध बनाबैबला
हमर लहु चियै, जे
बहुतो लोकसबके पापसे
छमा पाबैके लेल बहयाल
ज्यारहल छै।”



तब येसु कहलकै, “सिमोन, ए सिमोन देख! सैतान तोरासबके गहुमे जखा फटकैले आग्या माडनेछौ, महज तोहर बिस्बास नै डगमगावे कहके हम तोहर लेल परथना करनेचियौ, आ फेनो तु हमर दिसन घुइमके एलाकेबाद तोहर भाइसबके अस्थिर करा।” पतरुस कहलकै, “परभु, हम अहाँसडे जहलमे जाइले आ मरैले तयार चियै।” महज येसु ओकरा कहलकै, “पतरुस, साँचोके हम तोरा कहैचियौ, आइ रातके मुरगा डाँकैसे पहिने तु हमरा नै चिन्हैचियौ कहके तिन बेर इन्कार करबिही।”



येसु ओतेसे आपन चेलासब
जरे गेतसमनी नामके एकटा
जगहमे गेलै, आ उ आपन
चेलासबके कहलकै, “हम
कुछ अगा ज्याके परथना
करैचियै ताबे तक तुसब
अतै बैठलरह।” तब उ कहलकै,
“हे, पिता अहाँके लेल सब चिज
सम्भव छै। यि दुखके बाटी
हमरसे हटा दिया। महज हमर
इच्छा करल जखा नै, अहाँके
इच्छा करल जखा हेबे।”




तैबखत यहूदा सिपाहीसबके एकटा दल, मुल पुजारीसब आ फरिसीसबसे पठ्याल पहरेदारसबके ल्याके ओते एलै। उसब आपन साथमे लालटेम, उँकासब आ हाथ हथियारसब बोक्ने छेलै। तहै बखत चेलासबमेसे एक गोरे निकल्लै आ तरबारसे मुल-पुजारीके नोकरके देहना कान काइटदेल्कै। महज येसु कहल्कै, “भेलै, आब अकरा छोड़रदहै!” तब येसु ओइ लोकके कान छुबल्कै आ निक कैरदेल्कै।



तब उसब येसुके पकरलकै, आ पकैरके ओकरा मुल-पुजारीके
घरमे आनलकै। महज पतरुस दुरेसे ओकर पछा लागल गेलै।
लोकसब अडनाके बिचमे घुर पजाइरके तापैछेलै।
उसब जम्मा भ्याके बैठल
रहै। पतरुसो ओहै ठाम
आइबके ओइसबसडे बैठलै।



पतरुस कान काइट देल
नोकरके नातेदार ओतै छेलै,
आ नातेदार परैबला सेहो
परधान पुजारीके नोकर
छेलै। उ पतरुसके कहलकै,
“कि हम तोरा ओकरसडे
फुलबारीमे नै देखलियो?”
तब पतरुस फेनो इन्कार
करलकै, तखुन्ते मुरगा डाँक
देलकै। तब पतरुस बाहर निकैलके
हैकैच-हैकैचके काने लागलै।




तकरबाद महासभाके सब सदससब उठलै,
आ येसुके रोमी बडाहाकिम पिलातसलग
लगेलै। तब पिलातस ओकरा पुछलकै,
“कि तु यहूदीसबके रजा चिही?” येसु
जबाब देलकै, “से बात त
अहै कहैचियै।” पिलातस
येसुके छोड़रदैके इक्छा
करैत फेनो ओइसबके
समझैलकै। महज सब
लोकसब हल्लाकरतै रहलै,



“अकरा कुरुसमे लटका,
कुरुसमे लटका!”




तब पिलातस येसुके कुरूसमे लटकाइले
ओइसबके हाथमे सोइप देलकै। ओहैसे
सिपाहीसब येसुके ल्याके गेलै। तब येसु
आपन कुरूस आपनेसे बोइकके खप्पर
कहाइबला पहारमे गेलै, जकरा हिबरु भसामे
गलगथा कहैछै।



उ ठाममे उसब येसुके कुरुसमे लटकेलकै आ
ओकरसडे औरो दुइ गोरेके लटकेलकै, एकटाके
देहना कातमे आ दोसरके बमा कातमे। तब
येसुके ओइसबके बिचमे लटकेलकै।



सुरुजो इजोत दैले छोइरदेल्कै, मन्दिरमे लटकल परदा फाइटके दुइ चिरा भ्यागेलै। तब येसु जोर-जोरसे कहल्कै, “हे पिता, हम आपन आत्मा अहाँके हाथमे सोपै चियै!” अतेक कैहके ओकर परान छुइट गेलै।



अरिमाथिया सहरके योसेफ नामके एक
गोरा महासभाके सदस छेलै, जे
परमेस्वरके राजके बाट ताकैत
रहै। उ साहसके साथ
पिलातसलग गेलै आ येसुके
लहास माडलकै। तब
योसेफ छनगर सुतिके
बस्तर किनके
आनलकै, आ येसुके
लहास

कुरूससे निचा उताइरके
ओइसे लपेटलकै।
तकरबाद चटानमे खाइध
खुइनके बनाएल चिहानमे
राखलकै। ओइ चिहानके
मुह बरका पथलसे झाइप
देलकै।



दोसर बिहान, अरथात बिसरामके दिन,
मुख पुजारीसब आ फरिसीसब सडे
पिलातस ओते ज्याके ओकरा
कहलकै, “हौ सरकार!
हमरासबके याद छै जे उ
ठक आदमी जिबित
भ्याल बखत ‘हम तिन
दिनके बाद फेनो
जिबित भ्याके उठबै’
कहने
छेलै।”



“तब उसब ज्याके चिहानके मुहमे बन्द
करल पथलमे छाप लगेल्कै।
सिपाहीसबके सुरक्छा करैले
पहारा लगादेल्कै।”



बिसराम दिनके बिहान अरथात हप्ताके
पहिन्का दिन, एकदम भिनसरमे मरियम
मग्दलिनी आ दोसर मरियम
चिहान देखैले गेलै। अचानक
भुम्कौन भेलै कथिलेकी
परमपरभुके एकटा
स्वरगदुत स्वरगसे निचा
उतरलै आ चिहानके
मुहमे राखल पथल
गुरकाके

हटाइलकै आ
ओहिउपरमे बैठलै।
पहरा दैबला सिपाहीसब
ओकरा देखके डरेसे
थरथर कापैत भुइयामे
खैसके मुरदा जखा
भेलै।



तब स्वरगदुत ओइ जनिसबके कहलकै,
“नै डरा, हमरा मालुम छै कि तुसब
कुरुसमे टाइडके मारल येसुके खोजै
चिही। उ अते नै छौ महज
जनड कहने छेलै तहिनड उ
जिके उठल छौ। अते या,
ओकरा राखलहा
ठामके देख।”



उ जनि सबमे डर भेलै तैयो खुसीसे यि समाचार
चेला सबके सुनाबैके लेल चिहानसे दौरते गेलै।
अचानक येसु ओइसबके अगा देखा
परलै आ कहलकै, “तोर सबके सान्ती!”
उसब लगमे जाके गोरलागलकै।



अन्तमे जब एगारहो चेलासब बैठके खान-पिन करैतरहै तहै बखत येसु ओइसबके बिचमे परगट भेलै। उसबके अबिस्वास आ कठोर हिरदयके कारन येसु उसबके खिस्याइलकै। कथिलेत उ मरके जिबित भ्याल ओकरा देखैबला सबके बातमे उसब बिस्वास नै करने रहै। तकरबाद परभु येसु ओइसबसडे बोइल लेलाकेबाद स्वरग दिसन उठ्यालगेलै आ परमेस्वरके देहनाकात बैठलै।



कथिलेकी परमेस्वर सन्सारके लोकसबके
एहेन परेम करलकै कि उ आपन एकलौता
बेटाके देलकै। ओकर उपर बिस्वास
करैबला नास नै हेतै, महज उ
अनन्त जिबन पाबतै।



रोमी 3:23 कथिलेत सबलोक पाप करने छै आ परमेस्वरके महिमा तक पुगैले चुकल छै।

रोमी 6:23 कथिलेत पाप करैबलाके बैन मिरतु चियै, महज फोक्टेमे देल परमेस्वरके बरदान त अनन्त जिवन चियै जे अपनासबके परभु येसु खिरिस्टमे देनेछै।

हिबरु 9:27 जहिनड लोकसबके एकबेर मरनाइ निश्चित छै तहिनड मरलाकेबाद ओकर नियाय निश्चित छै।

एफिसी 2:8,9 कथिलेकी परमेस्वरके अनुगरहसे तुसब बिस्बाससे बच्याल गेलचिही। तुसब आपनेसे कोसिस कैरके नै, यि त परमेस्वरके देल बरदान चियौ। यि तोरासबके कामसे नै भैलछौ, नै त लोक घमन्ड करतियै।



रोमी 10:9,10 यदि तु येसुके हमर परभु चियै कहके आपन मुहसे सुइकार करबिही आ परमेस्वर ओकरा मरलसे जिबित करलकै कहके आपन हिरदयमे बिस्वास करबिही त तोहर उधार हैतौ। कथिलेत लोक आपन हिरदयसे बिस्वास कैरके परमेस्वरके अगा धरमी ठहरैछै आ बिस्वास करल बात आपन मुहसे सुइकार कैरके उधार पाबैछै।

युहन्ना 3:16,17 कथिलेकी परमेस्वर सन्सारके लोकसबके एहेन परेम करलकै कि उ आपन एकलौता बेटाके देलकै। ओकर उपर बिस्वास करैबला नास नै हैतै, महज उ अनन्त जिबन पाबतै। परमेस्वर त आपन बेटाके सन्सारके दोसी ठहराबैके लेल नै महज ओकरसे सन्सारके लोकसब बचे कहके पठेलकै।

1 युहन्ना 5:11-13 उ साक्छी यि चियै कि परमेस्वर अपनासबके अनन्त जिबन देने छै आ उ जिबन ओकर बेटामे छै। जकरसडे परमेस्वरके बेटा छै, ओकरसडे जिबन छै आ जकरसडे परमेस्वरके बेटा नै छै ओकरसडे जिबन नै छै। तुसब परमेस्वरके बेटाके नाममे बिस्वास करैबलासबके हम यि चिठी लिखैचियौ, ताकी तुसब अनन्त जिबन पाबनेचिही कहके थाह हेबे।



मती 26-28; लुका 22-24; युहन्ना 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Tharu Kochila NT (thq) © Wycliffe Bible Translators, Inc. All
rights reserved.

<https://www.bible.com/bible/3290/MAT.1.MTH>

©2025 Bible for Children, Inc.

www.M1914.org

www.bibleforchildren.org

